

Diocese of Lesotho

FIRST EUCHARISTIC PRAYER FOR SEASON OF CREATION THAPELO EA PELE EA EUKARISTE NAKONG EA TLHOLEHO/POPO

Morena a be le lona
'Me a be le lona

Phahamisang lipelo tsa lona
Re li phahamisetsa ho Morena

Ha re roriseng 'm'e re holiseng
Molimo oa tlholeho eohle
**Re binela 'Mopi ka
lipina tsa tlholeho**

A re bokeng Molimo 'Mopi, Morati
le 'Maballi oa tlholeho eohle
**Ha re thabeng ho 'Mopi oa rona,
Mohlokomeli le Molimo oa poelano**

kapa

Morena a be le lona
'Me a be le lona

Phahamisang lipelo tsa lona
Re li phahamisetsa ho Morena

A re leboheng Morena Molimo oa rona
Hoa tsoanela ho u leboha le ho u rorisa

Molimo ea matla ohle ka polelo ea lentsoe la hau u hlotse lintho tsohle tse lefatseng le leholimong. Moea oa hau o loeba holima boieane bo sa baleheng ba lihloliloeng tse phelang 'moho le ba lefatse lena le tetemang le rona baahi ba lona.

Joalokaha bophelo ba rona ba maobane bo le liatleng tsa hau, le eona tsepo ea bokamoso ba rona e ho uena. Joalokaha re furaletse tsela ea hau, re rethela hape mofuthung oa lerato la hau. Ka uena lintho tsohle li tlisitsoe bophelong bo bocha.

Selelekela se lokelang se kena mona

'Me joale hammoho le tsohle tse hloliloeng re phahamisa mantsoe a rona ho phatlalatsa khanya ea lebitso la hau:

Ua halalela, ua halalela, ua halalela
Morena Molimo oa bonatla

Leholimo le lefatse li tletse khanya ea hau.
Hosanna maholimong.
Ho bokoe ea tlang ka lebitso la Morena.
Hosanna maholimong.

Ka Bosiu boo a ekiloeng ka bona o ne a nke bohobe, a leboha a nto bo ngoatha e le ho lekanyetsa ho rojoa ha 'mele oa hae sefapanong. A bo nea metsoalle ea hae 'me a re: "Nkang le je, hona ke 'mele oa ka o nehetsoeng lona. Etsang hona khopotsong ea ka."

A nka veini eleng mosebetsi oa matsoho a motho le mpho e fanoeng ke lefatse 'me a leboha Molimo 'Mopi oa rona. O ile a tsela veini e le pontso ea mali a hae a tsolohileng. A e neha metsoalle ea hae a ntse a re: "Ana ke mali a ka a selekane se secha, a tsolletsoe lona le tlholeho eohle bakeng sa tsoarelo ea libe. Ka mehla ha le noa veini ena, etsang hona khopotsong ea ka".

Ha re phatlalatseng sephiri sa tumelo

Kreste o shoele
Kreste o tsohile
Kreste o tla boela a etla

Ka baka lena Molimo, rona ba labalabelang poelano; rona ba tsetselelang ho boelana e le rona; rona ba lakatsang ho boelana le tlholeho eohle, re atamela sephiri sena.

Ka ho rojoa ha 'mele oa hau, ka mali a hau a tsolohileng le ka ho patoa ha hau, bophelo bo hlahile hape. Ho rojoeng ha hau le maling a tsolohileng ho hlahile metso ea kabelano; lefung le kepelong ea hau ho hlahile peo ea bophelo bo bocha bo tlang ho tla.

Ha re ntse re lebeletse ho khutla ha hae la bobeli, re bile re talimile lefatse la rona, maphelo a rona le lipelo tsa rona, re boloke hau-fi-ufi le pono ena. Ka nyehelo ea bohobe le veini, re boelanye le lefatse la rona, 'me u re nehe bongoe bo tisoang ke 'mele oa hau o robiloeng, le mali a hau a tsolohileng, hape ka kepele le tsoho ea hau u boelanye tlholeho eohle le ho phetha thato e hau.

Romella holima rona le holima popo eohle ea hau, Moea oa hau oa bophelo o neng oa foke holima metsi a boliba tsimolohong. Tsosa ka ho rona moea oa mafolofolo 'me u tlose moea oa tsenyo. Re kopanye le uena 'meleng le maling a Mora oa hau, le Lentsoeng la hau le entsoeng nama.

Ka eena, hammoho le eena le ho eena bonngoeng le Moea 'Mopi, le tsohle tse bileng teng, le tse teng, le tse tlang ho ba teng popong eohle ea hau, re ema ka pel'a hau le ho u khumamela, Molimo oa tsohle, ka lipina tsa thoriso e sa feleng.

Tlotla le tlhompho le khanya le matla e be tsa hau kamehla le mehla. Amen!